

**НЕДЕЛЯ ВСЕХ СВЯТЫХ,
СУББОТУ ВЕЧЕРА, НА МАЛЕЙ ВЕЧЕРНИ,**

На **Г**осподи воззвах: поставим стихи 4.

И поем стихиры воскресны, 4, глас 8-й:

Вечернюю песнь, и словесную службу, Тебе Христе приносим: яко благоволил еси помиловати нас Воскресением.

Господи, Господи, не отвержи нас от Твоего лица: но благоволи помиловати нас Воскресением.

Радуйся, Сионе Святый, мати церквей, Божие жилище, Ты бо приял еси первый, оставление грехов, Воскресением.

Еже от Бога Отца Слово, прежде век Рождшееся, в последняя же времена, Тоежде от Неискусобрачныя воплощенное волею, распятие смертное претерпе: и древле умерщвленного человека спасе Своим Воскресением.

Слава: глас 6-й:

Мученик божественный лик, Церкви основание, благовестию скончание, вы делом Спасова глаголения исполните: вами бо врата ада на Церковь отверзшаяся заключишася, крове вашея литие идольския жертвы изсуши, закание ваше пороуди Церковное исполнение, безплотных удивите, Богу венценосцы предстоите: Егоже непрестанно молитесь о душах наших.

И ныне: Богородичен догматик, глас 8-й:

Како Тя ублажим Богородице? Како же воспоем Препоблагословенная, непостижимое таинство рождения Твоего? Веков бо Творец, и нашего Содетель естества, Свой образ ущедрив, низведе Самого Себя во истощание неизследимое: сый в невестственных недрах Отчих, во утробе Твоей Чистая, вселися, и плоть непреложно бысть, от Тебе Неискусобрачная, пребыв убо еже бе естеством Бог. Темже Ему покланяемся Богу совершенну, и Человеку совершенну, Тому во обоим зраце: ибо оба естества в Нем суть воистинну. Сугуба же вся проповедуем естественная Его свойства, по сугубому существу, два почитающе действия и хотения: единосущен бо сый Богу и Отцу, самовластно хочет и действует яко Бог: единосущен же сый и нам, самовластно хочет, и действует яко Человек. Того моли, Чистая, Всеблаженная, спаси души наши.

На стиховне стихира воскресна. Глас 8-й:

Возшел еси на Крест, Иисусе, снизшедый с Небесе, пришел еси на смерть, Животе Безсмертный, к сущим во тьме Свет истинный, к падшим всех Воскресение, просвещение, и Спасе наш, слава Тебе.

Таже богородичны, подобны 3. Глас 8-й:

Подобен: О преславного чудесе!

Стих: Помяну имя твое во всяком роде и роде.

Радуйся Богородице всепетая. Радуйся источнице, жизнь верным источающий. радуйся всех владычице, и госпоже твари благословенная. радуйся всенепорочная, препрославленная. радуйся всепречистая. радуйся палато. радуйся божественное селение. радуйся чистая. радуйся мати дево. радуйся богоневесто.

Стих: Слыши дщи и виждь, и приклони ухо твое.

Радуйся Богомати Пречистая. Радуйся верных надежде. Радуйся мира очищение. Радуйся всякия скорби избавляющи рабы твоя. Радуйся человекам утешение живоносное. Радуйся заступление. Радуйся предстолние призывающим Тя. Радуйся Божие Божественное пребывание, и горо святая.

Стих: Лицу Твоему помолятся богатии людстии.

Радуйся Богородице, Мати Христова. Радуйся едина надежде, человекам заступление. Радуйся прибежище. радуйся свещнице света светлый. Радуйся свеще освященная. Радуйся палато. Радуйся раю. Радуйся божественное селение. Радуйся источнице, источающъ воды притекающим к Тебе.

Слава, и ныне: Богородичен:

Егоже небо не вмести Дево Богородице, во чреве Твоем нетесноместно вместися, и пребыла еси Чистая, словом неизреченным, ничимже девству осквернишуся. Ты бо едина была еси в женах, и Мати, и Дева: и Ты едина Пречистая воздоила еси Сына Живодавца, и на объятиях Твоих носила еси недремлющее око. Но не остави недра Отча, якоже прежде век предбысть: но горе весь Бог со ангелы, доле весь из Тебе с человеки, и везде несказанно. Того моли Всесвятая Владычице, спаситися православно Богородицу Чистую исповедающим Тя.

По Ныне отпускаеши: И по Отче наш: тропарь воскресн. Слава, и ныне: богородичен. Ектении. И отпуст.

НЕДЕЛЯ ВСЕХ СВЯТЫХ, НА ВЕЛИЦЕЙ ВЕЧЕРНИ

По обычном псалме первую кафисму всю.

На **Г**осподи возвах: поставим стихов 10. И поем стихиры воскресны 3: и восточны 3: и святых 4.

Стихиры воскресны, глас 8-й:

Вечернюю песнь, и словесную службу, Тебе Христе приносим: яко благоволил еси помиловати нас Воскресением.

Господи, Господи, не отвержи нас от Твоего лица: но благоволи помиловати нас Воскресением.

Радуйся, Сионе Святой, мати церквей, Божие жилище, Ты бо приял еси первый, оставление грехов, Воскресением.

Восточны.

Еже от Бога Отца Слово, прежде век Рождшееся, в последняя же времена, Тоежде от Неискусобрачныя воплощенное волею, распятие смертное претерпе: и древле умерщвленного человека спасе Своим Воскресением.

Еже из мертвых Твое Воскресение славословим Христе, имже свободил еси Адамский род от адова мучительства: и даровал еси миру яко Бог жизнь вечную, и велию милость.

Слава Тебе Христе Спасе, Сыне Божий Единородный, пригвоздивыйся на Кресте, и воскресый из гроба тридневен.

Стихиры всем святым, глас 6-й:

Подобен: Всю отложивше:

Духовнии ветии, ученицы Спасовы, Духу органи бывше верою, разсеяшася в концы земли, честное проповедание православне сеюще: от нихже прозябоша божественным земледелием, и благодатию мученик воинства, страсть честную образующя, многообразными раздроблений ранами и огнем, и со дерзновением молятся о душах наших.

Огнем восплаями Господни любви, огня презреша, и яко божественное углие возжигаеми честнии мученицы во Христе, попалиша хвратное лести шатание: зверей же заградиша уста честным призыванием, и во главы усекаеми, посекоша врага вся ополчения, и кровей проливающе потоки терпеливно, Церковь напоиша верою просвещаему.

Со зверьми бравшеся, биеми мечем, ногтями растерзаеми, руками отъемлеми, и мучими твердии мученицы, и огнем вещественным нещадно палими, и прободаеми, и составы ссецаеми, претерпеша твердейше: упокоение

предвидеша будущее, и нетленные венцы, и славу Христа, Ему же со дерзновением молятся о душах наших.

Во всех концах страдавшая верно апостолы, мученики, священники богомудрая, честных жен священное стекание, священными песньми по долгу восхвалим, яко соединившася небесным земнии, и страстьми безстрастие благодатию Христовою прияша: и ныне яко звезды светлыя озаряюще нас, со дерзновением молятся о душах наших.

Слава: глас 6-й:

Мученик божественный лик, Церкви основание, благовестию скончание, вы делом Спасова глаголения исполните: вами бо врата ада на Церковь отверзшаяся заключившася, крове вашей литие идольския жертвы изсуши, заклание ваше пороуди Церковное исполнение, безплотных удивите, Богу венценосцы предстоите: Его же непрестанно молитесь о душах наших.

И ныне, Богородичен, глас 8-й:

Царь Небесный за человеколюбие на земли явися, и с человеки поживе: от Девы бо Чистая плоть приемый, и из Нея прошедый с восприятием: Един есть Сын, сугуб естеством, но не Ипостасию. Тем же совершенна Того Бога, и совершенна Человека воистинну проповедающе, исповедуем Христа Бога нашего: Его же моли Мати Безневестная, помиловатися душам нашим.

Вход. Свете тихий: Прокимен дне: Господь воцарися: и чтения.

Пророчества Исаиина чтение. [Глава 43.]

Тако глаголет Господь: вси языцы собравшася вкупе, и соберутся князи от них. Кто возвестит сия? или яже от начала, кто слышана сотворит вам? Да приведут свидетели своя, и оправдятся, и да услышат, и да рекут истину. Будите Ми свидетели, и Аз свидетель, глаголет Господь Бог, и отрок его же избрах: да познаете, и веруете Ми, и разумеете, яко Аз есмь: прежде мене не бысть ин Бог, и по мне не будет. Аз есмь Бог, и несть разве мене спасающий. Аз возвестих и спасох, уничижих, и не бе в вас чуждый. Вы Мне свидетели, и Аз Господь Бог, и еще от начала Аз есмь, и несть от рук Моих избавляяй: сотворю, и кто отвратит то? Сие глаголет Господь Бог, избавляяй вас Святыи Израилев.

Премудрости Соломони чтение. [Глава 3.]

Праведных души в руке Божией, и не прикоснется их мука. Непщевани быша во очесех безумных умерети, и вменися озлобление исход их: И еже от нас шествие сокрушение, они же суть в мире. Ибо пред лицом человеческим, аще и муку приимут, упование их безсмертия исполнено: И в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их: и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющиеся Нань

разумеют истину, и вернии в любви пребудут Ему. Яко благодать и милость в преподобных его, и посещение во избранных Его.

Премудрости Соломони чтение. [Глава 5.]

Праведницы во веки живут, и в Господе мзда их, попечение их у Вышняго. Сего ради примут царствие благолепия, и венец доброты от руки Господни: зане десницею покрывает я, и мышцею защитит их. Примет всеоружие рвение Свое, и вооружит тварь в месть врагом. Облечется в броня правды, и возложит шлем, суд нелицемерен. Примет щит непобедимый, преподобие: поострит же напрасный гнев оружие: споборет же с Ним мир на безумных. Пойдут праволучныя стрелы молниины, и яко от благокругла лука облаков, на намерение полетят. И от каменометныя ярости, исполнь падут грады. Вознегодует на них вода морская, реки же потопят я нагло. Сопротив станет им дух силы, и яко вихор развеет их: и опустошит всю землю беззаконие, и злодейство превратит престолы сильных. Слышите убо царие и разумеите, навикните судии концев земли. Внушите держащии множества, и гордящися о народех язык. Яко дана есть от Господа держава вам, и сила от Вышняго.

На Литии стихира храма.

Таже самогласны святых всех. Глас 1-й:

Веры согласием мирское торжество, от века Богу благоутодивших, патриархов честное и пророков сословие, апостолов удобрение, мучеников собрание, постников похвалу, всех святых память духовне празднуим: молят бо ся непрестанно, дароватися миру мирови, и душам нашим велией милости.

Приидите вси вернии, святых всех всеславную память, во псалмех, пениях и песнях духовных восхвалим: Крестителя Спасителя, апостолы, пророки и мученики, священноначальники, учителя же и преподобныя, постники и праведныя, и святых жен боголюбное состояние, честно ублажающе, согласно возопиим: Преблагий Христе Боже наш, тех молитвами подаждь мир Церквям Твоим, победы на враги христолюбивым людям, и душам нашим велию милость.

Приидите вси духовне возвеселимся о памяти святых: се бо прииде богатотворная нам дарования приносящи. Темже во гласе радости, и чистей совести возопиим, глаголюще: радуйтесь, пророков сословие, иже пришествие Христово мирови проповедавшие, и яже издавеча, яко близу предвидевше. Радуйтесь, апостольский личе, языков мрежницы, и ловцы человеков. Радуйтесь, мучеников соборе, от конец земли собравшиися во едину веру, и о той мук томления претерпевшии, и совершенно страдания венец приемшии. Радуйтесь, отцев наслаждение, своя телеса пощением истаявшие, и умертвивше страсти плотския, ум божественным рачением вперисте, на небеса возлетесте, и со ангелы водворяющесе, восприемлете вечная блага. Но о пророцы, апостоли, и

мученицы с постники, вас Венчавшаго прилежно молитесь, избавитесь от враг видимых и невидимых, в вере и любви совершающим присно честную память вашу.

Слава: глас 5-й:

Нынешнему торжеству стецемся вернии: предлагается и нам духовная трапеза, и чаша таинственная от сладких брашен, веселия исполнена мученических добродетелей. Сии бо терпеливодушнии от конец земли, телесное всеразличным предавшие ранам, Богу принесоша жертву словесну, всякий возраст: ови убо во главы усекаеми, ови же по хребту стружеми: друзии же рук отсечение и всех удов, вси вкупе святии Христовым страданием общницы быша. Но венцы тем возмездие мук подавый, Господи, во след тех жительствовати сподоби нас, яко Человеколюбец.

И ныне: Богородичен, глас тойже:

Храм и Дверь еси, Палата и Престол Царев, Дево Всечестная, Еюже Избавитель мой, Христос Господь, во тьме спящим явился, Солнце Сый правды, просветити хотя, яже созда по образу Своему рукою Своею. Темже, Всепетая, яко Матерне дерзновение к Нему стяжавшая, непрестанно моли спастись душам нашим.

На стиховне стихиры воскресны. глас 8-й:

Возшел еси на Крест, Иисусе, снизшедый с Небесе, пришел еси на смерть, Животе Безсмертный, к сущим во тьме Свет истинный, к падшим всех Воскресение, просвещение, и Спасе наш, слава Тебе.

Ины стихиры восточны по алфавиту.

Стих: Господь воцарися, в лепоту облечеся.

Христа славословим, воскресшаго от мертвых: душу бо и тело прием, страсти отобоюду отсече, пречистей убо души во ад сошедшей, егоже и плени: во гробе же истления не виде святое тело, Избавителя душ наших.

Стих: Ибо утверди вселенную, яже не подвижится.

Псалмы и песньми славословим Христе, от мертвых Твое Воскресение: имже нас свободил еси мучительства адова, и яко Бог даровал еси жизнь вечную, и велию милость.

Стих: Дому Твоему подобает святыня Господи, в долготу дний.

О Владыко всех Непостижимо, Творче небесе и земли, крестом пострадавый, мне безстрастие источил еси: погребение же прием, и воскрес во славе, совоскресил еси Адама рукою всеильною. Слава Твоему тридневному востанию, имже даровал еси нам вечную жизнь, и очищение грехов, яко Един Благоутробен.

Слава: глас 6-й:

Приидите вернии, днесь лик совокупивше, благочестно торжествуим, и всех святых преславную и честную память славно почтим, глаголюще: радуйтесь, апостоли славнии, пророцы, и мученицы, и священноначальницы. Радуйтесь, преподобных соборе и праведных. Радуйтесь, честных жен личе, и Христа о мире молите, победы на сопротивныя даровати, и душам нашим велию милость.

И ныне: Богородичен, глас 6-й:

Творец и Избавитель мой, Пречистая, Христос Господь из Твоих ложесн прошед, в мя Оболкийся, первая клятва Адама свободи. Темже Ти, Всечистая, яко Божии Матери же и Деве, воистинну вопием немолчно: радуйся ангельски, радуйся, Владычице, Предстательство и Покрове, и Спасение душ наших.

По Трисвятом тропарь: Богородице Дево радуйся: [Дважды]

И святы, глас 8-й:

Иже во всем мире мученик Твоих, яко багряницею и виссом, кровью Церковь Твоя украсившися, теми вопиет Ти, Христе Боже: людем Твоим щедроты Твоя низпосли, мир жительству Твоему даруй, и душам нашим велию милость. **[Единожды]**

И благословение хлебов. И чтение Послания соборнаго Иаковля.

Аще ли убо не творится бдение, на Господи возвах: воскресны 3: и восточен [анатолиев] един, и святых на 6. Подобен: Отложивше:

По Трисвятом тропарь воскресен: Слава: святым: И ныне: Богородичен: писаны в начале Утрени. И отпуст. На Полунощнице канон Троичный от Октоиха, гласа.

В НЕДЕЛЮ ВСЕХ СВЯТЫХ

НА УТРЕНИ

На Бог Господь: тропарь воскресный, глас 8-й:

С высоты снизшел еси Благоутробне, погребение приял еси тридневное, да нас свободиши страстей, Животе и Воскресение наше, Господи слава Тебе.

Слава: святым тропарь, глас 4-й:

Иже во всем мире мученик Твоих, яко багряницею и виссом, кровьми Церковь Твоя украсившися, теми вопиет Ти, Христе Боже: людем Твоим щедроты Твоя низпосли, мир жительству Твоему даруй, и душам нашим велию милость.

И ныне, Богородичен:

Еже от века утаеное и Ангелом несведомое таинство, Тобою, Богородице, сущим на земли явися Бог, в неслитном соединении воплощаемь, и Крест волею нас ради восприим, имже воскресив первозданного, спасе от смерти души наша.

По 1-м стихословии седален воскресен, глас 8-й:

Воскресл еси из мертвых, Животе всех, и ангел светел женам вопияше: престаните от слез, апостолом благовестите, возопийте поюще: яко воскресе Христос Господь, благоволивый спасти, яко Бог, род человеческий.

Стих: Воскресни Господи Боже мой, да вознесется рука Твоя * не забуди убогих Твоих до конца.

Человецы Спасе гроб Твой запечаташа, Ангел камень от дверей отвали: жены видеша вставша из мертвых, и тыя благовестиша учеником Твоим в Сионе, яко воскресл еси Животе всех, и разрешишася узы смертныя: Господи слава Тебе.

Слава, и ныне: Богородичен:

Иже нас ради рождется от Девы, и распятие претерпев Благий, испровергий смертию смерть, и воскресение явлей, яко Бог, не презри яже создал еси рукою Твоею: яви человеколюбие Твое милостиве, прими рождшую Тя Богородицу, молящуюся за ны, и спаси Спасе наш люди отчаянныя.

По 2-м стихословии седален, глас 8-й:

Подобен: Повеленное тайно:

Белоносяй Гавриил светел предста, яко в виде молнии, Христову гробу, и камень отвали от гроба, и страх велий содержаше Твоя стражи, и внезапно пребыша вси аки мертви. От гроба стражей, и камене печати устыдитесь, пребеззаконнии, разумеите, яко воскресе Христос.

Стих: Исповемся Тебе Господи всем сердцем моим, * поведем вся чудеса Твоя.

Подобен: Премудрости слова:

Воскрес от гроба яко воистинну, преподобным повелел еси женам проповедати востание апостолом, якоже писано есть: и скорый Петр предста гробу, и свет во гробе зря ужасашеся. Темже и видев плащаницы едины, кроме Божественного тела, в нем лежащая, со страхом возопи: слава Тебе Христе Боже, яко спасаеши вся Спасе наш, Отчее бо еси сияние.

Слава, и ныне: Богородичен настоящий:

О Тебе радуется, Благодатная, всякая тварь, ангельский собор, и человеческий род, освященный храме, и раю словесный: девственная похвало, из Неяже Бог воплотися, и Младенец бысть, прежде век сый Бог наш: ложесна бо Твоя престол сотвори, и чрево Твое пространнее небес содела. О Тебе радуется, Благодатная, всякая тварь, слава Тебе.

По Непорочнах тропари: Ангельский собор:

И по них ипакон, глас 8-й:

Мироносицы Жизнодавца предстояща гробу, Владыку искаху в мертвых, Безсмертного, и радость благовещения от Ангела приемша, апостолом возвещаху: яко воскрес Христос Бог, подай миру велию милость.

Степенна, глас 8-й: Антифон 1:

От юности моя враг мя искушает, сластями палит мя: аз же надеяся на Тя, Господи, побеждаю сего.

Ненавидящий Сиона, да будут убо прежде исторжения яко трава: ссечет бо Христос выя их, усечением мук.

Слава, и ныне: Святым Духом, Еже жити всяческим: Свет от Света, Бог Велик, со Отцем поем Ему, и Словом.

Антифон 2:

Сердце мое страхом Твоим да покрывается смиренномудрствующее: да не вознесшееся отпадет от Тебе, Всещедре.

На Господа имевый надежду, не устрашится тогда, егда огнем вся судити имать, и мукою.

Слава, и ныне: Святым Духом, всяк кто божественный видит, и предглаголет, чудодействует вышняя, в Трех Единого Бога поя: аще бо и трисияет, единоначальствует Божество.

Антифон 3:

Воззвах Тебе, Господи, вонми, приклони ми ухо Твое, вопиющу: и очисти, прежде даже не возмещи мене отсюду.

К матери своей земли отходяй всяк, паки разрешается, прияти муки, или почести поживших.

Слава, и ныне: Святым Духом, богословие Единица Трисвятая: Отец бо безначален, от Негоже родися Сын безлетно, и Дух сопрестолен, сообразен, от Отца спросиявший.

Антифон 4:

Се ныне что добро, или что красно, но еже жити братии вкупе? в сем бо Господь обеща живот вечный.

О ризе своей, иже крины сельныя украшая повелевает, яко не подобает пещися.

Слава, и ныне: Святым Духом, единовидною виною, вся содержатся мироподательне: Бог бо сей есть, Отцу же и Сынови единосущен господственне.

Прокимен, глас 8-й: Воцарится Господь во век, Бог твой Сионе в род и род.

Стих: Хвали душе моя Господа, восхваляю Господа в животе моем.
Всякое дыхание:

Евангелие от Матфеа воскресно, 1 утреннее, зачало 116:

Во время оно, едининадесять ученицы идоша в Галилею, в гору, аможе повеле им Иисус, и видевше Его, поклонившася Ему, ови же усумнешася. И приступль Иисус, рече им, глаголя: дадеся Ми всяка власть на небеси и на земли. Шедше убо научите вся языки, крестяще их во имя Отца и Сына и Святаго Духа, учаще их блюсти вся, елика заповедах вам, и се Аз с вами есмь во вся дни до скончания века. Аминь.

От сего убо дне утрення Евангелиа воскресна начинаем чести по ряду.

Воскресение христово: И псалом 50.

Таже, Слава: Молитвами апостол:

И ныне: Молитвами Богородицы:

Таже стих: Помилуй мя Боже:

Стихира, глас 6: Воскрес Иисус от гроба:

Каноны 4: воскресен со ирмосом на 4, крестовоскресен на два, и Богородице на два, и всем святым на 6.

Канон воскресен, глас 8-й:

Песнь 1.

Ирмос: Колесницегонителя фараоня погрузи, * чудотворяй иногда * Моисейский жезл, крестообразно поразив, * и разделив море, * Израиля же беглеца, пешеходца спасе, * песнь Богови воспевающа.

Всесильну Христову Божеству како не дивимся; от страстей убо всем верным, безстрастие и нетление точащу, от ребра же Святаго источник бессмертия искапающую, и Живот из гроба Присносущный.

Яко благолепен женам Ангел ныне явился, светлая нося образы естественныя невестественныя чистоты, зраком же возвещающая свет воскресения, зовый: воскресе Господь.

Богородичен: Преславная возглаголашася о Тебе в родех родов, Бога Слова во чреве вмещающая, чиста же пребывающая Богородице Марие. Темже Тя вси почитаем, сущее по Бозе заступление наше.

Канон крестовоскресен.

Ирмос: Воду прошел:

Взяшася врата болезненная, и ужасошася вратницы адовы, зряще в преисподнейшая сошедшаго, Иже на высоте всех превыше естества.

Удивишася чины ангельстии, зряще на престоле посаждено Отчи падшее естество человеческое, затворенное в преисподних земли.

Канон Пресвятей Богородице.

Ирмос: Поим Господеви:

Пречистая Богородице, воплощенное Присносущное и Пребожественное Слово паче естества рождающая, поем Тя.

Грозд Тя Живоносен, всемирнаго искапающе сладость спасения, Дева Христе роди.

Канон всем святым. Глас 8-й:

Егоже краестрочие: Святых всех многоименныя чины пою.

Ирмос: Колесницегонителя фараона ...,

Твоих святых воспеваю чины, Твоим светом души моей молитвами сих озаритися молюся: Ты бо еси свет непреступный, неведения мрак отгоня, Твоими светлостми, Слово Божий Светодавче Христе. [Дважды.]

Яко возвысился еси на Древе, привлекл еси к Твоему познанию языков все наследие, Владыко, и светом уяснил еси Святыя Троицы, апостолы святыми Твоими, имиже мглу прелести отгнал еси.

Законоположением Твоим, Христе, увещаваемы Твои апостоли, яже на земли вся благочестно отринуша, и светом благодати осветиша всю вселенную славнии, евангельски Тя проповедающе.

Слава: Радующеся мученицы, крест Твой взявшие, и честную страсть неуклонно подражающе, мучительскаго не убояшася прещения, доблии, ни огня, ни меча, ни ран, но ниже глада, ниже смерти.

И ныне, Богородичен: Намерение мужское девы, Всечистая, восприемше яве: мученическая бо страдания неуклонно подражающе, и псаломски в след Тебе, Сыну Твоему, Дево, божественне срадующеся, Всецарю приведошася.

Катавасия: Отверзу уста моя ...,

Песнь 3.

Ирмос: Утверждай в начале Небеса разумом, * и землю на водах основавый, * на камени мя, Христе, заповедей Твоих утверди, * яко несть свят, паче Тебе Единому Человеколюбче.

Осуждена бывша Адама вкушением греха, плоти Твоя спасительною страстию оправдал еси, Христе: Сам бо неповинен смертного искуса был еси, Безгрешне.

Воскресения свет возсия сущим во тьме, и сени смертной сидящим, Бог мой Иисус, и Своим Божеством крепкого связав, сего сосуды расхитил еси.

Богородичен: Херувимов и серафимов превышши явилася еси, Богородице: Ты бо Единая прияла еси Невместимаго Бога в Твоем чреве, Нескверная: темже Ты вернии вси песньми, Чистая, ублажаем.

Канон крестовоскресен.

Ирмос: Небесного круга Верхотворче ...,

Отвергнувшись прежде заповеди, Господи, изриновена мя от Тебе сотворил еси, в негоже вообразився, послушанию же навыв, Себе паки наздал еси распятием.

Премудростию вся проуведевый, Господи, и разумом Твоим водрузивый преисподняя, не не сподобил еси снисхождением Твоим, Слово Божий, воскресити, еже по образу Твоему.

Канон Пресвятей Богородице.

Ирмос: Ты еси утверждение ...,

Даждь нам помощь Твоими молитвами, Всечистая, прилоги отражающи лютых обстояний.

Еве праматери Ты исправление была еси, Начальника жизни мирови, Христа Богородице, рождши.

Канон всем святым.

Ирмос: Утверждай в начале небеса ...,

Священством священным священницы и пастырие облекшеся, и то мудрственно окормивше Христу, достойно украсиша учительства слово, свыше воистинну обогатившеся. [Дважды.]

Украсившися удобренными первого добротворения, и явившися яко непрелестная светила, онебесисте церковь Христову святити, отинуду инаго ту различно украсивше. [Дважды.]

Слава: **З**акону повинующеся Твоему блаженных собори, многообразными добродетельми просветившися: наследоваша обители небесныя, Владыко, радующеся: иную бо иной, вси тыя достойно исполниша.

Богородичен: **О**т чрева девственна, Иже от Бога Бога Слова родила еси нам, Богомати, Егоже девы чистыя боголепно возлюбиша, и в след Тебе вся Сему яве последоваша.

Седален, глас 8-й:

Подобен: Премудрости:

Праотец, отец, патриарх, апостол, мученик, пророк, святителей, и преподобных Твоих, постников и праведных же, и всякаго имене писаннаго в книзе жизни, святую память совершающе, Христе Боже, всех подвизаем на молитву, молящися: умири мир Твой теми, яко Человеколюбец, да вси вопием Ти: Боже, прославляемый в совете святых Твоих, Ты еси воистинну прославивый достойно память их.

Слава: тойже. И ныне: Богородичен:

Небесную дверь и кивот, пресвятую гору, светлый облак воспоим, неопалимую купину, словесный рай, Евы воззвание, вселенная вся великое сокровище, яко спасение в Ней соделася миру, и оставление древних согрешений. Сего ради вопием Ей: молися Сыну Твоему, прегрешений оставление даровати, благочестно покланяющимся всесвятomu Рождеству Твоему.

Песнь 4.

Ирмос: **Т**ы моя крепость Господи, * Ты моя и сила,* Ты мой Бог, Ты мое радование, * не оставль недра Отча, * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Ты врага суца мя зело возлюбил еси: Ты истощанием странным сошел еси на землю, Благоутробне Спасе, последнего моего досаждения не отвергся, и пребыв на высоте пречистыя Твоя славы, прежде безчестованнаго прославил еси.

Кто зря, Владыко, ныне не ужасается, страстию смерть разрушаему; Крестом бежащее тление, и смертию ад богатства истощаваемый, Божественною силою Тебе распятого; чудно дело, Человеколюбче.

Богородичен: **Т**ы верным похвала еси, Безневестная, Ты Предстательнице, Ты и прибежище христиан, стена и пристанище: к Сыну бо Твоему мольбы носиши, Всенепорочная, и спасаеши от бед, верою и любовию Богородицу Чистую Тебе знающих.

Канон крестовоскресен.

Ирмос: Услышах Господи ...,

На Кресте Тя пригвоздиша законопреступных дети, Христе Боже: имже спасл еси яко Благоутробен, славящия Твоя страдания.

Воскрес от гроба, вся совоскресил еси сущия во аде мертвые, и просветил еси яко Благоутробен, славящия Твое воскресение.

Канон Пресвятей Богородице.

Ирмос: Услышах Господи ...,

Клас возрастившая животворный, неоранная Ниво, подающего миру жизнь, Богородице, спасай поющия Тя.

Богородицу Тя, Всечистая, просветившия вси проповедуем: Солнце бо правды родила еси, Приснодево.

Канон всем святым.

Ирмос: Ты моя крепость Господи ...,

Совокуплься собор святых Твоих любовию, и Тебе наслаждайся, истинно же и чисто в радости, лик неразрушаемый ангелом сликует, о Тебе, Всевидче, Боже всех и Господе. [Дважды.]

Юношески славнии священномученицы, мученическим венцем увязостесь, богодетельным помазанием, еже первее священства украшени пребогати. Темже сугубы венцы достойно приемше, со Христом вечно радуется.

Плотское мудрование все духу, богоноснии, воистинну повинусте, постнически сего стремления неудержимая постом увядивше: и ныне безстрастия светом просветившися, мзды трудов приясте.

Слава: Яко Христа, мученицы, Первомученика, муки зело претерпесте, терпеливо же и доблественно, яко в чуждых страдальчествующе телесех, славнии, и ныне Царствия наследницы показавшися, верным исцеления источаете.

И ныне, Богородичен: Невеста Божия была еси, Богородительнице, Сего бо Слово пречечное, телесно родила еси нам: в Немже и жены свято поживше, и страдальчества всеразличными Тобою украсившися, праматернее падение исправиша.

Песнь 5.

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго; * но обрати мя, и к свету заповедей Твоих * пути моя направи, молюся.

Одеятися претерпел еси в багряницу прежде страсти Твоя, Спасе, поругаемь, первозданного покрывая безобразное обнажение: и наг пригвоздился еси на Кресте плотию, совлачая, Христе, ризу умерщвления.

От персти смертныя, Ты падшее мое паки надал еси существо, воскрес: и нестареющее, Христе устроил еси, явив паки якоже царский образ, нетления жизнь блистающ.

Богородичен: **М**атернее дерзновение, еже к Сыну Твоему имущи, Всечистая, сроднаго промысления, еже о нас, не презри, молимся: яко Тебе и Едину христиане ко Владыце очищение милостивно предлагаем.

Канон крестовоскресен.

Ирмос: Просвети нас ...,

Настави нас силою Креста Твоего, Христе: тем бо Тебе припадаем, мир подаждь нам Человеколюбче.

Окорми живот наш, яко Преблагий, поющих Твое востание, и мир подаждь нам, Человеколюбче.

Канон Пресвятей Богородице.

Ирмос: Утреннююще вопием Ти ...,

Утоли нестерпимую бурю страстей моих, Яже Бога рождающая, Окормителя и Господа.

Служат рождеству Твоему Пречистая Богородице, ангельстии чинове и человеков собрание.

Канон всем святым.

Ирмос: Вскую мя отринул еси ...,

Предзрети, якоже пророцы божественнии, хотящая быти сподобистесь, и возжелесте благородию души очиститися житием чистым, о богоноснии, просвещаеми силою Духовною. [Дважды.]

Лик святых ныне светится Божественными дарованьми, иже прежде закона вси патриарси, пророцы, апостоли, и мученик собори, и постников, и учителей, и праведных, со священномученики. [Дважды.]

Слава: Светящееся зряще Твоих святых днесь собрание, Твоею, Спасе, светлостию, и свещами неугасаемыми благодати, Твое Божественное богатство благих и изобилие воспеваем непрестанно, Человеколюбче.

Богородичен: Предивное Твое Рождество возлюбивше жены пречестныя, красная жития нивчтоже вмениша, Всечистая, Его едины рачительно желающе светлости и Божественнаго осияния.

Песнь 6.

Ирмос: Очисти мя, Спасе, * многа бо беззакония моя, * и из глубины зол возведи, молюся: * к Тебе бо возопих, и услыши мя, * Боже спасения моего.

Древом крепко низложи мя началозлобный: Ты же, Христе, вознесся на Кресте, крепче низложил еси, посрамив сего, падшаго же воскресил еси.

Ты ущедрил еси Сиона, возсиявый от гроба, новаго вместо ветхаго совершив, яко Благоутробен, Божественною Твоею кровию: и ныне царствуеши в нем во веки, Христе.

Богородичен: Да избавимся от лютых прегрешений, мольбами Твоими, Богородительнице Чистая, и да улучим, Пречистая, Божественное сияние, из Тебе неизреченно воплощенного Сына Божия.

Канон крестовоскресен.

Ирмос: Молитву пролию ко Господу ...,

Длани на Кресте распростерл еси, исцеляй неудержанно простертую во Едеме руку первозданнаго: и Твоею волею желчи вкусив, и спасл еси, Христе, яко Силен, славящая Твоя страдания.

Смерти Избавитель вкуси, древняго осуждения, яко да и тления царство разрушит, и во адская спешд, воскресе Христос, и спасе, яко Силен, поющая Его воскресение.

Канон Пресвятей Богородице.

Ирмос: Ризу мне подаждь светлу ...,

Храм Тя Божий и Ковчег, и чертог одушевленный, и дверь Небесную, Богородице, вернии возвещаем.

Требищ разрушитель, яко Бог, бывшее рождество Твое, Марие Богоневесто, покланяемо есть со Отцем и Духом.

Канон всем святым.

Ирмос: Очисти мя, Спасе ...,

Яко честный, избранный, положенный камень краеугольный, святии в Сионе обретше Тя, Владыко, основание непоколебимое, избранное каменеи себе наздаша. [Дважды.]

Пронзенным Твоим ребром, капли крове искапаша, с водою богодетельно, мир обновиша, и божественный собор святых всех Благодетелю приздаша. [Дважды.]

Слава: Поем всеблагочестно мученик облак божественный, благодатию просвещенный, и возсиявший светлее багряницею крове, и червленицею их твердаго страдания.

Богородичен: Матерь всеистинную Божию Тя вси знаем, Еюже естество женское избавльшееся, Всенепорочная, о Христе предпострада, добродетели же всякия благочестно бысть исполнено.

Кондак, глас 8:

Яко начатки естества, Насадителю твари, вселенная приносит Ти, Господи, богоносныя мученики, тех молитвами в мире глубоце Церковь Твою, жительство Твое, Богородицею соблюди, Многомилостиве.

Икос: **И**же по всей земли мучившиися, и на небеса преселившиися, иже страсти Христовы подражавшии, и страсти наша отъемлющии, zde днесь собираются, перворожденных показующе Церковь, яко горния образ содержащу, и Христу вопиющу: Бог мой еси Ты, Богородицею соблюди мя, Многомилостиве.

Синаксарь в неделю всех святых.

Стих: **Г**оспода моего вся пою други:

Стих: **А**ще же кто хотя ко всем да идет.

В тойже день в Неделю по Пятидесятнице, иже повсюду вселенная, во Азии, Ливии и Европии, севере же и юзе, святых всех праздник празднуем: егоже убо по Всесвятаго Духа сошествии божественнии отцы наши узакониша совершати, аки бы образ некий показующе, яко Всесвятаго Духа пришествие, сиевая апостолы действова, освятившее и упрямудрившее иже от нашего смешения, в наполнение отпадшаго онаго чина ангельскаго, сих уставившее, и Богу Христом приведшее. Овех убо мучением и кровию, овех же добродетельным житием и пребыванием, и яже паче естества соделовае. Сходит убо Дух Святыи в виде огня, естеством горнейшее имеяи предложение: восходит же к горним персть, естеством долу предложна сущи, и наше смешение, прежде в мале убо приятая, и обоженная Богом Словом плоть, вознесенная, и одесную Отчи славы седшая. Ныне же и всех влечет хотящих, яко обетование, якоже Богу Слову показующу примирения дела, и некий намеренный конец, еже к нам плотию пришествия Его и смотрения, якоже древле отриновенныя в соединение и дружество приводит Божие, незнающыя от язык люди, человеческого естества аки некия начатки приносящаго Богу, иже в нем различно благоискусившихся. По единому убо образу, сие всех святых празднуем праздник: по второму же, понеже мнози убо Богу благоугодиха добродетели ради крайния, и инообразно безыменитии от человек быша: или и за некая негли человеческая, многу же обаче славу от Бога имуще. Или яко мнози убо по Христе жительствоваха во Индии, и Египте, и Аравии, Междоречии же и Фригии, и иже выше Евксина моря: еще же и во всем западе, даже и до самех Вретанийских островов, и просто рещи, в востоце и западе. Не бяхе же подобно сих всех якоже подобает почести, ради безчислства, якоже церковный прият обычай: да убо еже от оных всех помощь приимем, идеже кто на земли Богу благоугоди. Инако же: и будущих ради, негли святых всех праздник божественнии отцы праздновати узакониша: всех же, иже прежде и послежде, явленных же и неявленных, во елицех Дух Святыи вселивыйся освяти, почитающе и свосприемлюще. Или и третие, подобаше по части на кийждо день празднуемая святых, и во един

собрати день да явится, яко о едином Христе подвизашася, и вси тожде добродетели текоша поприще. И тако вси яко единого Бога раби достойно венчани быша, Церковь сии составиша, горний мир вознаполняюще, поощряюще же и нас равный подвиг сим творити, различен сущ и многовиден, к по елику же каждо имать силы, всем усердием тщатися. Сим убо, иже от века святым всем, Лев приснопамятный и премудрый царь храм превеликий и предобный созда, близу же есть сей святых апостол храма внутри Константина града: прежде убо, якоже глаголют, феофане жене его первее сего созидавая, угодившей Богу в конец. И еже преславное посреде молв и царствий внутри: и понеже приобщи намерение свое Церкви, не обрете ея покоренныя воли своей, ниже восхоте мудрования его, глаголющи: яко не лепо есть ону, яже вчера недавно растлевашеся царским мечтанием, и пищею, внезапно почитати толико, якоже соиздати ей сицевый храм великолепный, и изрядный, и ниже время даяше е, аще и благоугоди Богу. Тогда премудрейший царь соборным хотением всея Церкви, великий храм, иже созда, посвяти всем святым вселенныя, глаголя: аще и Феофана есть свята, да сопричтется со всеми святыми. И сего ради аз мню, яко отселе прият начало праздноватися сей праздник, внегда быше и прежде. Сего ради положиша и последи всех праздников, окрест вся праздники лета состыгая, и заключаая аки ограждением. Зане церковное уставление и благочиние, аще и прежде многого начася, и помале приходяше в доброе уставление, якоже подобаше: но во дни сего царя уставиша в совершенное, и изобразиша чином, иже днесь есть. Триодь убо, вкратце рещи, обдержит внутри с великим прилежанием, елика Бог сотвори нас ради неизреченными словесы. Падение диаволе с небесе, первую притчею изгнание Адамово, и преступление: еже нас ради Бога Слова смотрение все, и како на небеса Святым Духом паки вздохом, и испадший оный чин исполнимом, еже святыми всеми познавается. Ведомо же буди, яко вся ныне празднуем, елика благодатно освяти Дух Святой: глаголю убо высочайшыя и освящательныя умы, девяти яже чинов: Праотцы и патриархи, пророки и священныя апостолы, мученики и священноначальники, священномученики и преподобномученики, преподобныя и праведныя, и вся святых жен ликования, и иныя вся безыменитыя святыя, с нимиже да будут и хотящии быти. Прежде же всех, и во всех, и со всеми, святых святую, пресвятую, и тех пребезсравнительно лучшую ангельских чинов, Госпожу нашу и Владычицу, Богородицу Марию Приснодеву:

Еяже молитвами Христе Боже, и всех от века святых Твоих,
помилуй и спаси нас, яко един Благ и Человеколюбец.

Песнь 7.

Ирмос: Божия снисхождения * огонь устыдися в Вавилоне иногда. * Сего ради отроцы в печи радованною ногою, * яко во цветнице ликующе пояху: * благословен еси, Боже отец наших.

Славное истощание, Божественное богатство Твоя нищеты, Христе, удивляет ангелы, на Кресте зрящия Тя пригвождаема, за еже спасти верою зовущия: благословен еси Боже отец наших.

Божественным Твоим сошествием света исполнил еси преисподняя, и тьма прогнана бысть прежде гонящая. Отнюдуже воскресоша иже от века юзницы, зовущие: благословен Бог отец наших.

Троицен: Всем убо Господа, Единого же единому Единородному Сыну православно Отца, богословяще Тя возвещаем, и Единого ведяще от Тебе исходяща Духа Праваго, Соестественна и Соприсносущна.

Канон крестовоскресен.

Ирмос: От иудей ...,

Спасение соделал еси посреде вселенныя, пророчески Боже: на древо бо вознесен быв, вся призвал еси верою зовущия: отец наших Боже, благословен еси.

Воскрес от гроба, якоже от сна, Щедре, всех избавил еси от тли, тварь же уверяется апостолы проповедающими востание: отцев Боже, благословен еси.

Канон Пресвятей Богородице.

Ирмос: От иудей ...,

От Девственных ложесн воплощься, явился еси на Спасение наше. Темже Твою Матерь ведяще Богородицу, православно зовем: отцев Боже, благословен еси.

Жезл прорастила еси, Дево, от корене Иессеова, Всеблаженная, Плод цветоносящи спасительный, верою Сыну Твоему зовущим: отцев Боже, благословен еси.

Канон всем святым.

Ирмос: Божия снисхождения ...,

Святых чинове, во святых почивающаго немолчно поюще, сладости божественныя ныне наслаждаются, и радующиеся, ликуют поюще: благословен Бог отец наших.

Божественными сияньми трисолнечнаго светопролития, честне святых собори осиявшеся, Единицу тричисленную богословят, Отца безначальна, и Сына благочестно, и Духа Святаго.

Неизреченною славою Твоею, егда явишися, Боже, посреде богов, достойная подавая, и дары раздавая, и венцы дая, тогда, Спасе, сподоби пети Тебе: благословен Бог отец наших.

Слава: Радующеся поим святых всех собор, отсюда собравшихся, и роды вкупе и достоинства, и жительства и с ними поем: благословен Бог отец наших.

И ныне: Богородичен: Марию Пречистую, и Пресвятую Богородительницу, отроковицы вся, лик божественный купно составивше, велегласно радующеся возопийте: радуйся, радости источник нам источающая.

Песнь 8.

Ирмос: Седмерицею пещь х* алдейский мучитель * Богочестивым неистовно разжже, * силою же лучшею спасены сия виде, * Творцу и Избавителю вопияше: * отроцы, благословите, священницы, воспойте, * людие, превозносите во вся веки.

Иисусова Божества Пребожественная сила, в нас боголепно возсияла есть: плотию бо вкуш за всех смерть крестную, разруши адову крепость. Егоже непрестанно дети благословите, священницы воспойте, людие превозносите во вся веки.

Распныйся воста, великовыйный паде, падый и сокрушенный исправися, тля отвержена бысть, и нетление процвете: Жизнию бо мертвенное пожерто бысть. Дети благословите, священницы воспойте, людие превозносите во вся веки.

Троицен: Трисветлое Божество, Едину сияющее зарю от Единого Триипостаснаго Естества, Родителя Безначальна: Единоестественно же Слово Отцу, и Царствующаго Единосущнаго Духа, дети благословите, священницы воспойте, людие превозносите во вся веки.

Канон крестовоскресен.

Ирмос: Победители мучителя ...,

На древе руце мне простершаго, обнаженному, призывающа мя, Своею благообразною согрести наготовю: благословите вся дела Господня, и превозносите Его во веки.

Из преисподняго ада вознесша мя, падшаго, и высокопрестольною славою Родителя почетшаго: благословите, вся дела Господня, Господа, и превозносите Его во веки.

Канон Пресвятей Богородице.

Ирмос: Царя небеснаго ...,

Сопротивных разжженные и пламенивидныя на нас угаси стрелы: яко да поем Тя во вся веки.

Преестественне Содетеля и Спаса, Бога Слова родила еси, Дево: темже Тя поем, и превозносим во вся веки.

Канон всем святым.

Ирмос: Седмерицею пещь ...,

Радуйтесь мученицы, пророцы, апостоли, священномученик честный соборе: праведных, преподобных же и учителей божественный личе, с мироносицами женами сладкопоюще: отроцы благословите, священницы воспойте, людие превозносите во вся веки.

Я же паче ума светлостию, насыщаеми святии божественнаго веселия, и радости исполняеми, бози бываєте, к Богу приближением, богодетельным светлостем общающеся, и славы неизреченныя просветившеся лучами, Христа превозносите во вся веки.

Благословим Отца, и Сына, и Святаго Духа, Господа.

Явившеся, святии, яко звезды многосветлыя, церковное небо уясняете различными дарованьми и различными добротами, в правде, целомудрии, мужестве, разуме: Владыку священницы воспойте, людие превозносите во вся веки.

И ныне: С веселием вся жены богомудрыя, скончавшиися, поют Духом Деву Пречистую, истинную Матерь Божию, от клятвы праматере Евы нас избавившую, благоговейно предстояще, Тоя воспойте Плод во веки.

Хвалим, благословим, покланяемся Господеви, поюще и превозносяще во вся веки.

Катавасия: Отроки благочестивыя ...,

Таже поем: Честнейшую херувим:

Песнь 9.

Ирмос: Ужасеся о сем Небо, * и земли удивилася концы, * яко Бог явился человеком плотски, * и чрево Твое бысть пространнейшее Небес. * Тем Тя Богородицу, * Ангелов и человек чиноначалия величают.

Божественным и Безначальным Естеством прост сый, сложился еси приятием плоти, в Тебе Самом Сию составив, Слове Божий, и пострадав яко человек, пребыл еси кроме страстей, яко Бог. Темже Тя во Двою Существо нераздельно и неслиянно величаем.

Отца по Существо Божественному, якоже естеством быв человек, рекл еси Бога Вышний, рабом снисходя, воскрес от гроба, благодатию Отца земнородным полож, иже по естеству Бога же и Владыку, с Нимже Тя вси величаем.

Богородичен: Явилася еси, о Дево Мати Божия, паче естества рождши плотию Бога Слова, Егоже Отец отыгну от сердца Своего прежде всех век, яко Благ, Егоже ныне и телес превышша разумеем, аще и в тело облечеся.

Канон крестовоскресен.

Ирмос: Устрашися ...,

Божия Тя естеством убо Сына, зачатого во утробе свемы Богоматере, и бывшего нас ради Человека, и зряще Тя на Кресте естеством убо страждуща человеческим, безстрастна же, яко Бога пребывающа, величаем.

Разрушися тьма дряхлая, от ада бо возсия Солнце Правды Христос, земли просвещая вся концы, сияя Божества светом, Небесный Человек, Бог земный: Егоже во двою естеству величаем.

Канон Пресвятей Богородице.

Ирмос: Воистинну Богородицу ...,

Радости и веселия исполнь есть память Твоя, приступающим исцеления точащи, и благочестно Богородицу Тя возвещающим.

Псалмы Тя воспеваем Благодатная, и немолчно, еже радуйся, приносим: Ты бо источила еси всем радость.

Канон всем святым.

Ирмос: Ужасеся о сем небо ...,

Надежду и любовьию вооруженно, и верно огражденно счисление избранных, вся мучителей прещения, муки, и раны радующеся претерпеша, благославно от Христа обогатившеся, победотворящаго в страданиях истины, первомученики.

Пристанище спасения, Крестителя, апостолы, пророки и мученики с постники, божественныя учителя и священники, патриархов же собрание, и священномученики благославныя, жены боголюбивыя, преподобныя и праведныя ныне достойно восхвалим.

Слава: Огнем искусившеся искушений, и сластями не прельстившеся, радуется чисте, престолу Владычню световидному предстояще, славнии собори святых на небесех, разрешившимся зеркалом, сени же мимошедшей истинными явленьми.

И ныне: Богородичен: Явилася еси разстоящимся совокупительная: Тобою бо ангелом единосельницы на небесех человецы быша воистинну, и свидетельствуют чинове всех святых, ныне с ними поюще Твое Рождество, Дево Богородице, в вечных песнях.

Катавасия: Всяк земнородный ...,

Свят Господь Бог наш: поем по гласу.

Таже ексапостиларий воскресен:

Со ученики взыдем на гору Галилейскую, верою Христа видети глаголюща власть прияти вышних и нижних, научимся: како учит крестати во имя Отца, и Сына, и Святаго Духа, языки вся, и пребывати с таинники, якоже обещае, до скончания века.

Слава: Светилен всем святым. Подобен:

Крестителя и Предтечу, апостолы, пророки, мученики, священноначальники же, постники и преподобныя, священномученики, купно боголюбивыя жены и праведныя вся, и ангелов чины, должно песньми увязем молящися, славу сих получитьи от Христа Спаса.

И ныне, Богородичен:

Иже горе прославляемый божественне от ангелов, от недр Отчих, Пречистая, не отступль неизреченно, с дольными поживе: Ты же Сего была еси спасения ходатаица, от чистых Твоих кровей Сему, Чистая, паче слова плоть заимодавши. Егоже моли рабом Твоим избавление дати прегрешений.

На хвалитех, Всякое дыхание: поставим стихов 8.

И поем стихиры воскресны, глас 8-й:

Господи, аще и судилищу предстал еси от Пилата судимый, но не отступил еси от престола со Отцем сядя: и воскрес из мертвых, мир свободил еси от работы чуждаго, яко Щедр и Человеколюбец.

Господи, аще и яко мертва во гробе иудеи положиша, но яко Царя спяща воины Тя стражаху, и яко живота сокровище, печатью печаташа, но воскресл еси, и подал еси нетление душам нашим.

Господи, оружие на диавола Крест Твой дал еси нам: трепещет бо и трясется, не терпя взирати на силу Его: яко мертвыя возставляет, и смерть упраздни. Сего ради поклоняемся погребению Твоему и востанию.

Ангел Твой, Господи, Воскресение проповедавый, стражи убо устраши, женам же возгласи, глаголя: что ищите Живаго с мертвыми; воскресе Бог сый, и вселенней жизнь дарова.

Ина стихира восточная тогожде гласа:

Пострадал еси Крестом, Безстрастный Божеством, погребение приял еси тридневное, да нас свободиши от работы вражия, и обезсмертив оживотвориши нас Христе Боже, воскресением Твоим, Человеколюбче.

Ины стихиры всем святым, глас 4-й:

Подобен: Яко добля:

Святыя Господь иже на земли удиви: Того бо раны и страдания в плоти восприяша, в сих красящися, и божественными удобренъми явленно удобряеми: яже воспоим яко неувядающия цветы, яко звезды непрелестныя Церкви, яко вольная зачатия.

Стих: Воззваша праведнии, и Господь услыша их.

С пророки апостоли, с преподобными учителие, со священномученики вси праведнии, и жен пострадавшее, и любовию постившееся святых множество, и

праведных чинов, да восхвалятся священными песньми, яко горняго Царствия наследницы, яко рая жителie.

Стих: Дивен Бог во святых Своих:

Иже землю онeбесившии добродетелей светлостию, иже Христову смерть подражавшии, безсмертия ходатайственный путь шествовавшии, иже страсти человеком рукодействием благодати очистившии, иже во всем мире единомушно страдальчествовавшии, доблественне да восхвалятся мученицы.

Слава: стихира утренняя евангельская, 1-я. Глас 1-й:

На гору учеником идушим за земное вознесение, предста Господь, и поклонившеся Ему, и данныя власти везде научившеся, в поднебесную посылахуся проповедати еже из мертвых воскресение, и еже на небеса возшествие: имже и во веки спребывати неложный обещася Христос Бог, и Спас душ наших.

И ныне: Прeблагословенна еси Богородице Дево:

Славословие великое.

По трисвятом тропарь воскресен точию, ектении: и отпуст. И час 1-й в притворе: и поучение студитово: и совершенный отпуст.

В НЕДЕЛЮ ВСЕХ СВЯТЫХ На Литургии

Блаженна воскресна гласа, на 4, и от канона всех святых песнь 6, на 4.

Помяни нас, Христе Спасе мира, якоже разбойника помянул еси на древе: и сподоби всех, Едине Щедре, Небесному Царствию Твоему.

На древе пригвожден быв, Спасе наш, волею, яже от древа клятвы Адама избавил еси, воздая, яко Щедр, еже по образу, и райское селение.

Слыши, Адаме, и радуйся со Евою: яко обнаживый прежде обоя, и прелестию возьм вас пленники, Крестом Христовым упразднися.

Днесь Христос воскрес от гроба, всем верным подая нетление, и радость обновляет мироносицам по страсти и Воскресении.

Яко честный, избранный, положенный камень краеугольный, святии в Сионе обретше Тя, Владыко, основание непоколебимое, избранное камение себе наздаша.

Пронзенным Твоим ребром, капли крове искапаша, с водою богодетельно, мир обновиша, и божественный собор святых всех Благодетелю приздаша.

Слава: **П**оем всеблагочестно мученик облак божественный, благодатию просвещенный, и возсиявший светлее багряницею крове, и червленицею их твердаго страдания.

Богородичен: **М**атерь всеистинную Божию Тя вси знаем, Еюже естество женское избавышася, Всенепорочная, о Христе предпострада, добродетели же всякия благочестно бысть исполнено.

Прокимен апостола, глас 8-й: Помолитесь, и воздадите Господеву Богу нашему.

Стих: Ведом во Иудеи Бог, во Израили велие Имя Его.

И святым, глас 4-й: Дивен Бог во святых Своих, Бог Израилев.

Апостол ко евреом, зачало 330: (Евр. 11:33-12:2)

Братие, святии вси верою победиша царствия, содеяша правду, получиша обетования, заградиша уста львов, угасиша силу огненную, избегоша острия меча, возмогоша от немощи, быша крепцы во бранех, обратиша в бегство полки чужих. Прияша жены от воскресения мертвые своя; инии же избиени быша, не приемше избавления, да лучшее воскресение улучат; друзии же руганием и ранами искушение прияша, еще же и уз и темниц. Камением побииени быша, претрени быша, искушени быша, убийством меча умроша, проидоша в милотех, и в козях кожах, лишени, скорбяще, озлоблени. Ихже не бе достоин

весь мир, в пустынях скитающиеся, и в горах, и в вертепах, и в пропастях земных. И сии вси послушествовани бывше верою, не прияха обетования, Богу лучшее что о нас предзревшу, да не без нас совершенство примут. Темже убо и мы, толик имуще облажащ нас облак свидетелей, гордость всяку отложше, и удобь обстоятельный грех, терпением да течем на предлежащий нам подвиг, взирающе на начальника веры и совершителя Иисуса.

Аллилуиа, глас 4-й: Воззваша праведнии, и Господь услыша их.

Стих: Мнози скорби праведным, и от всех их избавит я Господь.

Евангелие Матфеа, зачало 38:

Рече Господь Своим учеником: всяк иже исповестъ Мя пред человеки, исповем его и Аз пред Отцем Моим, иже на небесех, а иже отвержется Мене пред человеки, отвергуся его и Аз пред Отцем Моим, иже на небесех. Иже любит отца или мать паче Мене, несть Мене достоин, и иже любит сына или дщерь паче Мене, несть Мене достоин, и иже не примет креста своего и вслед Мене грядет, несть Мене достоин. Тогда отвещав Петр рече Ему: се, мы оставихом вся и вслед Тебе идохом, что убо будет нам? Иисус же рече им: аминь глаголю вам, яко вы шедши по Мне, в пакибытие, егда сядет Сын Человеческий на престоле славы Своея, сядете и вы на двоианадесяте престолу, судяще обеманадесяте коленом Израилевом. И всяк, иже оставит дом, или братию, или сестры, или отца, или мать, или жену, или чада, или села, имене Моего ради, сторицею примет и живот вечный наследит. Мнози же будут первии последнии, и последнии первии.

Причастный: Хвалите Господа с небес:

Другий: Радуйтесь праведнии о Господе:

На трапезе утешение братии, готовящимся к постному подвигу.

[зри] Подобаает ведати: аще храм всех святых: На Малей и Велицей вечерни, и на Утрени, и на Литургии, подобне поем, якоже случится в Неделю великаго святаго. Емуже бывает бдение. Точию на Утрени поем полиелей.

По полиелеи: Величаем вас апостоли, мученицы, пророцы, и вси святии, и чтем святую память ващу: вы бо молитесь о нас Христа Бога нашего.

Псалом избранный: Блажен муж бояйся Господа:

И седален святым, писан в каноне по 3-й песни.

Степенна гласа. Прокимен: Всякое дыхание: И Евангелие святым. Воскресение Христово: и псалом 50. Слава: Молитвами всех святых: И ныне:

Молитвами Богородицы: Вместо Воскрес Иисус: стихира всем святым, кую волиши.

Канон воскресен со ирмосом на 4, и богородицы на 2, и святым на 8. И прочее, якоже предписася.

Конец, и Богу слава.